

Malaysia-China Kekal Sebagai Sahabat dan Rakan Kongsi
Bernama
Mei 30, 2014
Oleh D. Arul Rajoo

BEIJING (CHINA), 30 Mei (Bernama) -- Perdana Menteri Datuk Seri Najib Tun Razak percaya Malaysia dan China akan terus menjadi sahabat serta rakan kongsi keamanan dan kemakmuran.

Najib, yang berada di sini untuk lawatan enam hari sempena ulang tahun ke-40 hubungan diplomatik Malaysia dan China, berkata beliau amat yakin yang hubungan kedua-dua negara akan terus utuh sehinggalah 40 tahun akan datang.

"Dalam masa empat puluh tahun lagi, pada 2050-an, kami akan berada di pertengahan 'Abad Asia'.

"Sudah pasti China bakal menjadi kuasa ekonomi terbesar dunia, dan Malaysia akan menjadi negara yang lebih matang dan maju," kata beliau dalam artikel iklan yang disiarkan dalam akhbar People's Daily pada Jumaat.

Najib turut menulis mengenai pandangan jauh bapanya yang juga Perdana Menteri Kedua Tun Abdul Razak dalam mewujudkan hubungan diplomatik dengan China pada 1974 ketika Malaysia masih lagi sebuah negara baharu, yang memperoleh kemerdekaan kira-kira 20 tahun sebelum itu.

"Jalinan hubungan diplomatik ini adalah satu peristiwa bersejarah - malah, Malaysia adalah negara pertama Asia Tenggara yang mengiktiraf Republik Rakyat China," kata beliau.

Perdana Menteri berkata empat dekad kemudian, Malaysia telah berubah daripada sebuah negara pertanian kepada negara perindustrian yang moden dan kini menuju status negara maju.

China juga telah berubah dengan ketara dan kini ia adalah ekonomi kedua terbesar di dunia.

"Ia muncul semula sebagai Kuasa Besar dalam orde dunia yang baharu dan multipolar. Dengan negara-negara kita dan dunia telah berubah dengan ketaranya, satu perkara terus kekal: ikatan persahabatan yang kukuh di antara rakyat negara kita," kata Najib.

Menurutnya persahabatan itu telah menghasilkan kejayaan ekonomi dengan China menjadi rakan dagang tertinggi Malaysia, yang mencatatkan perdagangan dua hala sebanyak AS\$106 bilion tahun lepas.

Najib yang juga Menteri Kewangan berkata pelaburan antara kedua-dua negara semakin

meningkat dengan pelaburan langsung asing China di Malaysia telah mencecah AS\$920 juta pada 2013.

Perdana Menteri turut menarik perhatian bahawa hubungan rakyat dengan rakyat juga semakin utuh dan komuniti Cina Malaysia memastikan Malaysia sentiasa mempunyai jalinan hubungan istimewa dengan China.

"Mungkin tidak ada simbol persahabatan yang lebih baik daripada ketibaan dua panda gergasi China, yang kini gembira tinggal di Zoo Negara - dan menjadi tumpuan rakyat Malaysia," kata beliau.

Walaupun mempunyai ikatan kukuh antara kedua-dua negara, Najib berkata cabaran yang tidak dijangka tetap berlaku sambil merujuk kepada kehilangan pesawat Malaysia Airlines Penerbangan MH370 pada 8 Mac lepas - dengan 154 orang penumpangnya terdiri daripada warganegara China.

Beliau berkata tragedi itu adalah amat sukar bagi Malaysia, namun dalam keadaan mencabar sedemikian, ikatan persahabatan kedua-dua terus utuh.

"Saya sangat berterima kasih kepada China di atas sumbangannya - sama ada dalam bentuk kepakaran dan teknikal, serta aset-aset yang disumbangkan China bagi membantu operasi mencari termasuk pesawat dan kapal," kata beliau.

Najib berkata Malaysia juga terhutang budi dengan banyak negara di atas bantuan mereka dalam operasi mencari MH370, seperti Australia yang menerajui operasi itu di luar Perth.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1042731>